

NGA RETA TUKU MAI KI NGA ETITA.

HERETAUNGA.

Ki Te Etita,

E hoa tena koe, te mahi mai na i tena wahi o te maara waina a to tatou Ariki. Tenei hoki te mahi nei i tenei wahi o taua maara. Tenei nga kanohi o te kikokiko me nga kanohi o te ngakau, te matukitaki iho nei, ki te kupu whakarite a te Karaiti mo te "kai rui." Tenei te rui nei, ko etahi o ana purapura i ngahoro ki te oncone atahua tonu hoki nga hua, ko etahi i ngahoro ki te wahi kohatu, paoa iho e te ra, maroke tonu atu, ko etahi i ngahoro ki te wahi tataramoā, katahi ka werowerohia e te tataramoā ara e nga mea o te ao, mate tonu atu; ka kino te haere a te tataramoā. Tenei ra kei te rui nga kai rui, ma te Atua ia e mea kia tipu. E ki ana ko Paora i a 1 Kor. iii, 6: "Naku i whakato, na Aporo i whakamakuku, ma te Atua ia e mea kia tipu." Engari e te hoa mahi, ki te whakaaro iho a te ngakau, e whakatata ana tenei ki te wa e pai ai te takoto a te whenua, e iti ai nga wahi kohatu, e iti ai hoki nga wahi tataramoā. I penei ai na te mea kua puta te kupu a nga kaumatua o Heretaunga kia whakaturia ano nga Komiti Takiwa, hei pehi i nga raruraru ki raro hei whakaara i nga mahi o te whakapono ki runga, hei hanga hoki i te pai ki nga takiwa katoa o Heretaunga.

Kua mutu noa atu te hui o Porangahau, he nui no te raruraru i roa ai te whakaatu i etahi o nga mahi o nga kupu korero o taua hui. Kotahi tekau ma waru nga take a te tangata whenua he mea whakarapopoto na te hui katoa aua take 18, kia rima. Na nga tangata i hui ki reira, i whakauru atu etahi take e rua, ka whitu katoa ai nga take o te hui, ko etahi o nga take me korero e au.

1 Ko te whakapono. Kotahi te ra e whaka-haere ana i tenei take. Ko nga korero he whakakaha i te whakapono.

2 Ko te Pire Poari.

(a) Kia tu te hunga e tautoko ana i te Poari, ki te whakamarama i taratou tautoko.

(b) Kia tu te hunga e turaki ana i te Poari, ki te whakamarama i ta ratou turaki, kia marama ai te wahi hei nohoanga mo ratou ki te taha whakatu ranei i te Pire, ki te taha turaki ranei.

(c) Ko te whakatikatika i etahi o nga rarangi o te Poari. Ko te rarangi ingoa o nga tangata

o Porangahau i uru ki te taha turaki, i te hui o te Kohitanga i tu ki Papawai, kati no tenei hui, ka unuhia e ratou to ratou rarangi ingoa ki waho o te turaki, ka uru ratou ki te taha whakatikatika i te Poari.

3 Ko te whakawhiiti i te Pire tono 'Mana motuhake' ki Ingarangi, (Home Rule)

4 Ko te pooti mema mo te Paremata o te Koroni. E rua nga mema a nga tangata o Porangahau i whiriwhiri ai, (1) ko Mohi Te Atahikoia, (2) ko Wi Pere. Tera atu etahi take o te hui, kati nei aku e whakaatu ai. Ko etahi o nga mahi o te hui, he haka, i nga takiwa ano e rite ana mo tera mahi. Ko etahi, he waiaata maori, pakeha hoki me era atu tu ahua whakangahau i te tangata. Ko te ahua o te kai i rite tonu ki ta te pakeha tikanga. He nui atu te whakamihii o nga tangata i tae ki taua hui, ki te tangata whenua mo to ratou kaha ki te whakahaere i nga mahi o te marae, mo te kore raruraru hoki.

No te 19 o nga ra o Hune i hemo ai a Te Ahooterangi, i taka i te hoiho. He nui te pouri i pa ki nga tangata katoa o Heretaunga, o era atu wahi hoki. He tangata rangatira ia, no Whanganui no Taupo, no Whakatane, no era atu takiwa hoki. I moe ia i a Atareta, hei tamahine ma Renata Kawepo.

Kanui te mihi o te tangata ki Te Pipiwharaua. Ma te Atua tatou e whakakaha ki te mahi i tana e pai ana. Na to hoa i roto i te Ariki.

Katene Pukerua.

Omahu,

Hurua 12, 1899.

TE URANGA O TE RA.

Ki a Te Pipiwharaua,

E manu, tena koe.

Rua haeretia enei kupu torutoru o tenei o marae, ki era o mare. No nga ra o Hurua nei i tae mai ai a te Reweti T. Makena Kohere, tetahi o Etita, ki konei kia kite i tona koka, i ona taia, me tona iwi i a Ngatiporou. I karakia haere ia i nga pakeha me nga Maori o tenei takiwa. I karakia ano ia i nga tumariki o te kura o Te Araroa me Tikitiki. I puta tana mihi mo nga tamariki o enei kura, mo to ratou kakama, mo to ratou ma. Engari te kura kua tino piki inaianei ko Rangitukia, ko te kura a Tawa-mapua. I te whakamatautauranga a Te Pope nuku atu i te 93 i roto i te 100 i puta. Kihai i taea e Te Pope te pupuri tona ngakau mihi. Ko te toru tenei o nga